

# Kartanan Pastoral

Desde komienso di siglo 18, 1 & 2 Timoteo huntu ku Tito ta klasifiká komo kartanan pastoral di Tèstament Nobo, pasobra nan ta kartanan ku Pablo a skirbi na dos pastor hóben: Timoteo i Tito. E bukinan aki ta splika kon kos mester anda den iglesia.

Tur tres karta ta mas personal ku Pablo su otro kartanan. Pablo tabata skirbi na dos persona ku e tabata stima. Ma maske Pablo a dirigí e kartanan pa Timoteo i Tito, ta parse ku tabata su intenshon pa nan lesa e kartanan pa nan iglesianan tambe. Ademas, maske e kartanan ta mas parti práktiko na lugár di teológiko...maske Pablo rípidamente ta enfatisá ku mester protehá iglesia kontra siñansa falsu i proveé siñansa sano

Ta bon pa klaria ku maske Timoteo i Tito a funshoná komo pastornan, nan tabata mas bien Pablo su representantenan na e iglesia.

Di e tres kartanan, 1 Timoteo tabata e promé karta pastoral ku Pablo a skirbi. E di dos tabata dirigí na Tito. No tabata te fin di su bida ku Pablo a skirbi su último karta pastoral, 2 Timoteo.

Nos ke mira diferente punto ku ta afektá tur tres buki promé ku nos ta studia kada buki individualmente.

## I. OUTOR DI E KARTANAN PASTORAL

No tabatin pregunta mes si e bukinan pastoral tabata outéntiko te siglo 19. E fecha ei, oponentenan liberal ku tin delisia pa ataká loke Beibel ta bisa klaramente a inventá un teoria ku e bukinan pastoral no tabata skirbí pa apòstel Pablo. Nota nan argumentonan i kontestanan pa nan argumentonan.

Argumento di Oponentenan	Kontesta
No por harmonisá e eventonan historiko mensioná den e Kartanan Pastoral ku e krónologia den e buki di Echunan.	E argumento aki ta ignorá e echu ku Pablo a haña su liberashon despues di Echunan 28—loke Pablo a antisipá (Filipensenan 1:19,25-26; 2:24; Filemon 22). Echunan no ta duna un relato di tur loke Pablo a hasi despues di esei. E eventonan mensioná den e Kartanan Pastoral a tuma lugá despues di Echunan 28.
E siñansa falsu ku e Kartanan Pastoral ta kombati ta gnostisimo. Ma gnostisimo no tabata desaroyá kompletamente te siglo dos.	Ta bèrdat ku tin similaridat entre e doktrina falsu ku e Kartanan Pastoral ta kombati i gnostisimo di siglo dos. Ma tambe tin diferensianan. E siñadó falsu ku Timoteo a enkontrá tabata den iglesia (1:3-7) i nan siñansa tabata basá riba legalismo hudui (1:7; Tito 1:10,14; 3:9).
E organisashon den iglesianan deskribí den e Kartanan Pastoral no a desaroyá asina tantu te siglo dos.	E organisashon den iglesia mensioná den e Kartanan Pastoral ta harmonisá ku e organisashon ku por haña den iglesianan ku Pablo a funda (Echunan 14:23; Filipensenan 1:1).

E Kartanan Pastoral no ta kontené e lemanan normal di Pablo su doktrina.	E Kartanan Pastoral ta mensioná lemanan ku ta harmonisá ku e siñansa di Pablo den su otro kartanan; inspirashon di Skritura (2 Timoteo 3:15-17), elekshon (Tito 1:1-2), salbashon (Tito 3:5-7), divinidat di Kristu (Tito 2:13), Kristu Su mediashon entre Dios i hende (1 Timoteo 2:5), Kristu Su obra supstitushonal (1 Timoteo 2:6)
E vokabulario griegu di e Kartanan Pastoral ta kontené hopi palabra ku Pablo no a usa den su otro kartanan den Tèstament Nobo.	Tin diferente manera ku nos por splika e difrensia den stail, gramátika i vokabulario den e Kartanan Pastoral. En kontraste di Pablo su otro kartanan, e Kartanan Pastoral tabata kartanan personal. Esei di mes ta eksigi un otro stail i vokabulario. Huntu ku esei, un person su stail di skirbi ta kambia pa motibu di edat, eksperensia, ambiente, eksperensia, okashon, relashon ku e person ku ta risibí e karta. Pablo su bista tabata malu i el a hasi uso di sekretarianan pa skirbi su kartanan. Pablo a usa un sekretario i a duné bastante libertat pa skirbi e karta na su manera. Pablo no a preokupá asina tantu pa e teksto ta palabra pa palabra loke el a bisa pasobra e kontenido no tabata asina krusial, por ehèmpel, manera lo ta e kaso ku un buki doktrinal manera Romanonan. Un persona ku por tabata su sekretario skirbiendo e bukinan aki por ta Lukas, skirbiendo ku su mes palabranan loke Pablo a instruí pa skirbi.

Segun nan a proponé, e stail gramátiko i vokabulario ta diferente, i pues, no por ta Pablo ku a skirbi e kartanan aki. Segun nan, un persona ku hopi apresio pa Pablo a pretendé ku e ta e apòstel renombrá ku el a skirbi e kartanan aki durante e di dos siglo pa kombatí gnostisismo.

Nos lo mira diferente evidensia ku ta demonstrá ku Pablo mes a skirbi e bukinan di 1 & 2 Timoteo i Tito.

## A. EVIDENSIA EKSTERNO

Evidensia ekstero ta fuerte ku Pablo ta e outor di e tres kartanan. Diferente lider di iglesia antiguo a afirmá ku Pablo a skirbi e kartanan pastoral: Policarpo (A.D. 65-155), Clemente di Roma (A.D. ?-101), Justino Mártir (A.D. 100-160), Ireneo (A.D. 130-202), Tertuliano (A.D. 160-220), Clemente di Alejandría (A.D. 150-215), i Kanon Muratorian (A.D. 170-200)—e promé kompilashon konosí di bukinan kanóniko di Tèstament Nobo. Di bèrdat, no tin evidensia ku asta ún iglesia tabata di opinion ku e kartanan aki tabata falsifiká...esta, ku Pablo no a skirbi nan. Solamente Romanonan i 1 Korintionan tin mas testigu favoreciendo Pablo komo outor.

## B. EVIDENSIA INTERNO

Tin evidensia den e teksto mes ku Pablo tabata eskritor di e kartanan pastoral.

1. E promé palabra di kada un di e kartanan pastoral ta “*Pablo*”. Maske esei no ta proba sin duda ku e kartanan no ta falsifiká, no por ignorá esaki.

2. Pablo i iglesia antiguo tabata hopi konsiente di e pusibilidat di falsifikashon i a oponé esei fuertemente. Pablo asta a avisá ku esaki lo sosodé. Pablo a skirbi, “...*no wòrdu moví lihé for di boso manera di pensa, ni bira inrankil pa motibu di un spiritu òf un mensahe òf un karta ku supuestamente a bin di nos... Ami, Pablo, ta skirbi e saludo aki ku mi mes man, i esaki ta e señal den tur karta; asina mi ta skirbi.*” (2 Tesalonisensenan 2:2; 3:17).

Segun nos ta komprendé di historia via Tertuliano, iglesia antiguo a ekspulsá un ansiano pasobra el a skirbi un karta asina. Ademas, ta notabel ku iglesia antiguo a duda pa asepta e buki di Hebreonan komo un buki kanóniko di Tèstament Nobo pasobra nan no tabata sigur ken a skirbi e buki. Lidernan di iglesia lo no a asepta e kartanan pastoral si nan no tabata konvensé ku Pablo tabata e outor genuino.

3. Un persona ku ke falsifiká un karta lo a evitá di agregá tantu echu, nòmber i detaye manera ta e kaso den e kartanan pastoral. Un hende ku ke falsifiká un dokumento ta evitá di duna detayenan, pa lektornan no por saka afo ku e dokumento ta falsifiká.

4. Un persona ku ke pretendé ku e ta Pablo ta un persona ku ta apesiá Pablo. Ma si e ta stima Pablo asina tantu, pakiko el a skirbi puntonan negativo tokante e apòstel? Sigur un persona ku tantu apesio pa Pablo lo no skirbi “*antes mi tabata un blasfemadó i un pèrsiguidó i masha agresivo mes*” (1:13) òf “*Esaki ta un palabra fiel, ku ta meresé pa wòrdu aseptá kompletamente, ku Cristo Jesus a bin na mundu pa salba pekadó, entre kendenan ami ta esun di promé*” (1:15).

5. Siñansa i informashon biográfiko den e buki ta harmonisá ku loke nos sa di Pablo (p.e. 1:12-17; 2:7). Tin tantu informashon biográfiko i siñansa ku ta muestra ku e bukinan ta teksto outentiko skirbí pa apòstel Pablo—informashon i siñansa ku no ta harmonisá ku e pensamentu ku e eskritor tabata un falsifikadó bibando den síglo dos.

6. Kiko un falsifikadó lo logra dor di skirbi un buki pastoral i pretendé ku tabata Pablo a skirbi esei? Especialmente kiko esei lo logra añanan despues?

7. E stail di skirbi i contenido di e kartanan pastoral no ta kuadra ku e stail i contenido di bukinan falsifiká, skirbí despues di e era apostólíko.

8. Pakiko un falsifikadó lo skirbi tres karta pastoral? Nan contenido no ta tan distinto. Ta mas lógiko pa pensa ku e falsifikadó lo a skirbi solamente ún karta na lugá di tres karta karta.

## II. OKASHON PA E KARTANAN PASTORAL

Ora e buki di Echunan ta klousurá, Pablo ainda tabata enkarselá na Roma (Echunan 28:16,20). E bukinan di 1 & 2 Timoteo i Tito a wòrdu skirbí despues ku historia dokumentá den buki di Echunan a klousurá. Nos no ta sigur di eventonan ku a sosodé ku Pablo despues di e relato den e buki di Echunan. Ma ta parse ku nos por saka afo lo siguiente:

Pablo a haña su libertat despues di Echunan 28 i a kontinuá ku su aktividatnan mishonero na Asia Menor i Gresia kompañá pa Timoteo, Tito, Lukas, i kisas otronan.

En kontraste di loke el a pensa (Echunan 20:25,38), Pablo a logra bishitá Efeso atrobe. Pues, ta parse ku Pablo a manda su promé karta pa Timoteo, ora el a sigui su biaha pa Masedonia (1 Timoteo 1:3). Talbes Pablo tabata na e stat di Filipos na Masedonia ora el a skirbi e karta.

Ta parse ku Timoteo tabata sinti e peso pisá i responsabilidat pa ku iglesia di Efeso. E mester deshasí di doktrina falsu, mantené doktrina sano, korigí práktikanan den sirbishinan publiko, i desaroyá i apuntá lidernan ku ta spiritualmente maduro. Ademas, pasobra Timoteo tabata mas hóben, ta parse ku esaki a afektá su kurashi (1 Timoteo 4:12). Kisas e no a sintié kalifiká i digno pa tuma enkargo di un iglesia di Efeso...un iglesia ku e gran apòstel Pablo a funda.

Pesei, Pablo a skirbi su promé karta na Timoteo na Efeso (1 Timoteo 3:14-15). Tabata Pablo su plan pa bolbe serka Timoteo na Efeso, ma el a kere ku e lo tarda pa bin (1 Timoteo 3:14-15; 4:13). Ta aparentá ku Pablo ya kaba a duna Timoteo instrukshon verbal. Awor el a pone su instrukshon pretu riba blanku i a agregá mas informashon. Probabelmente Pablo a skirbi su di dos karta pa Timoteo tambe mientras Timoteo tabata enkargá ku iglesia di Efeso.

Pablo tambe a bishitá isla di Kreta—kisas un bishita kortiku—i a laga Tito ei (Tito 1:5) ku un enkargo similar ku esun di Timoteo...pa organisá e iglesia ei.

Kòrda ku iglesianan no tabatin edifisio e tempu ei. No tabata te mas òf ménos 200 aña despues di Pablo su morto ku iglesianan tabatin edifisionan. Lo tabatin hopi grupo òf grupito di kreyentenan ku a reuní tur kaminda den stat di Efeso. Lídernan di e gruponan aki probabelmente tabata e “ansianonan” (Echunan 20:17; 1 Timoteo 3:1). Timoteo tabata responsabel pa ku nan.

Despues ku Pablo a skirbi su karta pa Tito, tabata e apòstel su intenshon pa pasa wenter na stat di Nikópolis, parti pabou di Gresia (Tito 3:12). Nos no sa unda Pablo tabata ora el a skirbi Tito.

E karta di 2 Timoteo ta mas personal. Ora Pablo a skirbi e karta aki, e tabata prisionero, probabelmente lokalisa na Roma. E tabata sigur ku e lo wòrdu ehekutá (2 Timoteo 4:6-8). Manra nos ya kaba a bisa, ta probabel ku Timoteo tabata na Efeso ketu bai. Den 2 Timoteo 4:13, Pablo a instruí Timoteo pa bin serka dje i pa “*trese e mantel ku mi a laga na Troas*”. Si Timoteo tabata na Efeso, Troas lo tabata un sitio ku e mester a pasa tòg na kaminda pa yega serka Pablo na Roma.

Un lider den iglesia antiguo, Eusebio, a skirbi lo siguiente tokante Pablo:

“Ta bisá ku Pablo, despues di defendé su mes, a kontinuá ku su ministerio di predikamentu, i a yega na e stat (Roma) pa di dos biaha, i a kaba su bida komo martir. Mientras e tabata prisionero, el a skirbi e di dos karta na Timoteo, den kua el a menshoná su promé defensa, i su morto pendiente.”

### III. FECHA DI E KARTANAN PASTORAL

Pablo a wòrdu enkarselá pa promé biaha na aña A.D. 59 (Echunan 21-28). Segun nos por komprendé di historia, emperador a haña Pablo inosente i a dun’é su libertat na aña A.D. 61. Pablo a kontinuá ku su ministerio mishonero. E apòstel lo a skirbi e kartanan di 1 Timoteo i Tito na aña A.D. 62 òf 63 (mas tardá, aña A.D. 64).

Na aña A.D. 64, un gran parti di Roma a kima. Emperador Nero a akusá kristiannan pa e desaster i a usa esei komo un kapa pa inisiá persekushon kontra kreyentenan. Awor ku kristianismo a bira ilegal, Pablo a wòrdu arestá i enkarselá na Roma atrobe na aña A.D. 67. Durante e enkarselashon aki, Pablo a skirbi su último karta, 2 Timoteo, probabelmente durante promé parti di aña A.D. 67, debí ku Pablo a pidi Timoteo pa bin promé ku wenter (2 Timoteo 4:21). Pablo tabata sigur ku emperador Nero lo ehekut’é. Segun tradishon, esei ta presis loke a sosodé. Despues di esaki, Nero a kometé suisidio na luna di yüni, A.D. 68.

### IV. KARAKTERISTIKANAN SIMILAR DI E KARTANAN PASTORAL

Nos ke ripará algun punto ku por yuda nos komprendé e Kartanan Pastoral mas mihó:

#### A. SIMILARIDAT

Nota algun palabra, frase òf lema similar den e tres buki aki.

- “*Dios nos Salvador*” – 1 Timoteo 1:1; 2:3; Tito 1:3; 2:10; 3:4  
Ademas Pablo a usa e ekspreshon “*nos Salvador, Kristo Jesus*” (2 Timoteo 1:10), “*Jesu-Cristo nos Salvador*” (Tito 3:6)
- “*E fe*” – Ripitidamente Pablo ta menshoná “e fe”...no solamente “fe”. Ora e apòstel ta usa e palabra “fe”, e ta referí na konfiansa. Ma “e fe” ta referí na e siñansa di Palabra di Dios.  
Den e siguiente tekstonan nos ta mira e palabra “e” promé ku fe den nos Beibel Santu (sikiera den e teksto griegu): 1 Tim 1:19; 3:9; 4:1,6; 5:8; 6:10,12,21; 2 Tim 1:5; 3:8,10; 4:7; Tito 1:13; 2:2. Den algun otro teksto, Beibel Santu ta agregá e palabra “e” promé ku e palabra “fe”, ma e no ta den e teksto griegu (1 Timoteo 1:14; 3:13; 2 Timoteo 1:13; Tito 1:1).
- “*Fieldat*” i “*fiel*” – 1 Timoteo 1:12,15; 3:1,11; 4:9; 2 Timoteo 2:2,11,13 Tito 1:9; 3:8
- “*Palabra fiel*” – 1 Timoteo 1:15; 3:1; 4:9; 2 Timoteo 2:11; Tito 1:9; 3:8
- “*Doktrina/siñansa sano*” – 1 Timoteo 1:10; 4:6; 2 Timoteo 4:3; Tito 1:9; 2:1

- Oposishon kontra doktrinal falsu
  - ✓ Pablo a deskribí ki sorto di hende e siñadónan di doktrina falsu ta. Nan ta:
    - ✓ Hambrá pa plaka – 1 Timoteo 6:5; 2 Timoteo 3:2; Tito 1:11
    - ✓ Gañadónan – 2 Timoteo 3:13
    - ✓ Hipókritanan – 2 Timoteo 3:5; Tito 1:16
    - ✓ Gusta diskutí – 1 Timoteo 1:4,6; Tito 3:8-9

## B. KOMPARASHON

Nos por haña un mihó bista di e Kartanan Pastoral dor di kompará algun aspekto di e tres buki ku otro:

	1 Timoteo	Tito	2 Timoteo
Fecha di skirbi e buki	A.D. 62-64	A.D. 62-64	A.D. 67
Sitio unda Pablo a skirbi	Deskonosí	Deskonosí	Roma
Sitio di risibidó di karta	Efeso	Kreta	Probabelmente Efeso
Kontenido	Prinsipalmente pastoral	Ménos pastoral	Prinsipalmente personal
Foko	Protehá e evangelio (6:20)	Praktiká e evangelio (3:8)	Prediká e evangelio (4:2)

## Literatura Konsultá

- Alexander, David & Patricia ed. *Eerdmans' Handbook to the Bible* (Grand Rapids, Michigan: William B. Eerdmans Publishing Company, 1973), p. 618-621.
- Baxter, J. Sidlow, *Explore the Book* (Grand Rapids: Zondervan Publishing House, 1966), p. 229-242.
- Demaray, Donald E. *Bible Study Sourcebook* (Los Angeles: Cowman Publishing Company, 1964), p. 170-171.
- Earle, Ralph. Gaebelein, Frank. E. ed. *The Expositor's Bible Commentary*: (Grand Rapids: Zondervan Publishing House, 1990), vol. 11, p. 341-347.
- Gromacki, Robert G., *New Testament Survey* (Grand Rapids: Baker Book House, 1974), p. 293-296.

- Gundry, Robert H. *A Survey of the New Testament* (Grand Rapids, Michigan: Zondervan Publishing House), p. 304-307.
- Guthrie, Donald. Tenney, Merrill C. gen. ed. *The Zondervan Pictorial Encyclopedia of the Bible* (Grand Rapids, MI: Zondervan, 1976), vol. 4, p. 611-618.
- Jensen, Irving L., *Jensen's Survey of the New Testament* (Chicago: Moody Press, 1981), p. 373-377.
- MacArthur, John. *MacArthur's Quick Reference Guide to the Bible* (Nashville, TN: W Publishing Group, 2001), p. 268-274, 279-280.
- Mears, Henrietta C., *What the Bible is All About* (Minneapolis: World Wide Publications, 1966), p. 553-555.
- Poehnell, Gray, New Testament Survey class notes, PBI, 1983.
- Tenney, Merrill C., *New Testament Survey* (Grand Rapids: Wm. B. Eerdmans Publishing Co., 1961), p. 333-336.
- Wilkinson, Bruce & Boa, Kenneth. *Talk Thru the Bible* (Nashville, TN: Thomas Nelson Publisher, 2002), p. 426-431.